



Ofisal Niusleta blong Vanuatu Women's Centre

Nius Edition

Halo long yufala ol gudfala rida blong niuspepa ia. Mifala I glad tumas blong kivim aot namba tu niusleta blong mifala long wanem wok we mifala I stap mekem tru aot long Vanuatu. Vanuatu Women's Centre hemi stap helpem fulap woman, pikinini (gel mo boe) mo kivim aot fulap inomesen long ol man we oli stap live mo fesem domestik vaelens long wanwan hom blong olgeta.

I kat fulap positif impak long ol wok we mifala I stap mekem. Fulap klaen oli stap kam everidei long ofis mo ol branj blong mifala. Long samfala manis I pas, VWC hemi bin saenem MOU wetem tufala mein panta blong hem we hemi, Vanuatu Polis Fos mo Ofis blong Pablik Prosecuta blong tokbaot hao nao bae ofis I save wok klos moa wetem olgeta ia. Mifala I bin holem tu wan Open Dei we long taem ya mifala I bin soem ol wok we wanwan diptmen insaed long senta istap mekem.

Vanuatu Women's Centre I wantem talem bigfala tank yu iko long ol wokman, ol Man Lida (Male Advoket) we oli stap wok wetem ol branj, ol KAVAW (rural volentia) mo ol patna blong VWC we oli kivim bigfala sapot long wok we oli stap mekem long ol komuniti .

Bigfala tankio iko long ol Gavman blong Ostrelia, Gavman blong Niu Zilan mo UN Women thru long Pacific Partnership Program mo Oxfam blong stap givhan long vatu blong VWC isave mekem wok blong hem, blong daonem ol rabis fasin we istap gohed long ol woman mo ol pikinini.

POLIS MO VWC OLI SAENEM MOU

Vanuatu Polis Fos mo Vanuatu Women's Centre I bin saenem wan Memorandum blong Andastanding long namba 14th Julae, 2021 blong tokbaot relsonsi blong wok we tufala patna ia ikat blong helpem ol victim blong domestik vaelens mo ol narafala rabis fasin we istap hapen long komuniti tedei spesili wetem Famli Protekxon Dipatmen. Stampa wok blong Vanuatu Women's Centre hemi kaonselling seves we mifala istap kivim iko long ol woman mo ol pikinini.

MOU ia hemi kivim wan klia andastanding long ol wok mo responsabiliti blong tufala patna tuwods jenerol pablik. Hemia bae hemi karem aot olgeta tinktink olsem hu mo hao nao blo mekem wok blong kivim seves iko long ol woman mo pikinini tru aot long Vanuatu.



Deputy Polis Komisina Operesen, Kodineta, Polis Komisina mo Akting Ostrelia Hae Komisina

OFIS BLONG PABLIK PROSEKUTA MO VWC I SAENEM MOU



OLI HANDEM OVA DOKUMEN BITWIN TUFALA OFIS

Wan moa Memorandum of Andastanding I bin tek ples bitwin Ofis blong Pablik Prosecuta mo Vanuatu Women's Centre long namba 28 Julae, 2021 blong kaedem wei we tufala patna bae I wok togeta blong helpem ol viktim mo witnes long ol kes blong prosekutem ol kriminol ofens we I tekem tugeta famili/domestik loa wetem seksual mo jenda-bes vaelens.

Long toktok bifo saening blong MOU, Pablik Prosecuta (PP), Mr. Josaia Nai-gulevu hemi talem "bigfala tankio iko long Vanuatu Women's Centre long ol wok we ofis I bin stap mekem long bifo kasem tedei blong protektem ol viktim tru long ol ligel wok mo blong provaedem sef haos, Ofis blong Pablik Prosecuta I wantem talem bigfala tankio iko long yufala".

Long toktok blong Kodineta blong senta, hemi talem se, "VWC bae hemi kontinu blong wok wetem Gavman, tru long Ministri blong Jastis mo Komuniti Seves mo wetem Ofis blong Pablik Prosecuta blong mekem sua se ol wok wetem ol victim mo ol man we oli stap mekem ol problem I mas kohed nomo blong evriman I kasem jastis". Bae tugeta ofis I wok tugeta blong helpem ol victim blong save kasem jastis.

"Stopem kalja blong vaelens agensem ol woman: ol man tu oli kat responsibiliti blong vaelens agensem ol woman".



Vanuatu Women's Centre I bin holem staff ritrit blong hem long namba 13 kasem 18 Jun 2021, long Erakor Island Resot. Ritrit ya hemi tekem tugeta olgeta staff long ol mein branj blong senta long Torba kasem Tafea Provins. I bin kat ova 50 staff oli stap long ritrit ia. Ol gudfala trening mo toktok I bin kam klong Coordinator blong senta, Ms. Tatavola Matas mo ol narafala staff. Long taem ia, ol staff oli bin ko tru long olgeta roles mo wanem blong mekem olsem wan staff blong Senta.

Olsem stampa wok hemi kaonselling, ritrit ia hemi olsem wan rifresa long ol topik olsem: Domestik Vaelens, Jenda Relason, Vaelens akensem ol woman mo Loa wetem Kot. Long taem ia tu, I bin lukim tim blong Cyber Safety Pasifika, oli bin kam blong tokbout ol isu we fulap lo yumi istap fesem tedei tru long ol mobael fon mo ol narafal electric defaes. Oli tokbout ol niufala loa we I save helpem ol man, woman mo pikinini blong narafala I no save spolem yu tru long ol elektronik defaes ia. Dr. Jeff Garae, Sargent Jeff Natapei, Jackson Miake mo Romaric nao oli bin mekem wan dei trening long topik ia.

HCDI



Wan local NGO we oli singoutem "Human Capacity Development International" we insaed ikat Dr.Astrid Kersten mo Carren Bough oli bin kam ranem wan (1) dei trening long saed blong OCAT (Oganisation Capacity Assessment Tool) wan took blong mesarem wok blong VWC long saed blong ol aksen plan blong wok, manejment, polici, patnasip mo faenans.

Fulap woman oli neva aot lo vaelens we oli stap fesem pesentej blong ol I kasem 43% mo 57% oli neva ko long wan ajensi o ofis blong kasem help.

TOCC MOBILE KAONSELING MO AWEANES



Long namba 8 septemba 2021, TOCC ibin mekem Mobile Kaonseling mo Aweanes long Nerkon - Vanualava. Ibin kat Aweanes toktok long saed blong VWC Histri mo ol sevis, jenda, Domestik Vaelens (ol defren fom blong Domestik Vaelens mo Saekol) mo Famili Proteksen Loa. Namba blong Pipol taem ia hemi - 12 woman, 13 gel, 5 man mo 7 boe.

"Domestik Vaelens hemi brekem ol bun, heart mo hom. No letem ispoelem famili blong yu"

TRENING BLONG ACR



Manejmen mo ol Projek Ofisa blong Vanuatu Women's Centre oli bin holem 5 dei woksop blong oli save kompletem Activity Completion Report (ACR), we hemi base long ol ripot mo luk ol wok we oli stap mekem long lasfala 5 yia program, Julae 2016 kasem Jun 2021.

Ikat olgeta jalenjes long ol wok we oli tokbaot mo ol jenjes blong olgeta program, Network Prevention blong VWC mo ol sevis we oli stap respond long hem mo ikat wan niu patnasip we VWC istap luk fowod blong wok wetem long nekis 5 yia we istap kam, . Vanuatu Women's Centre iwantem talem tankio iko lo mein dona hemi Ostreila Depatmen blong Foren Afeas mo Trade (DFAT), mo narafala dona patna olsem UNW, OXFAM mo MFAT, long olgeta sapot we oli gohet blong kivim ol program blong Stopem Vaelens Agensem ol Woman mo ol Pikinini tru aot long Vanuatu.

KONKRATULASEN IKO LONG VWC STAFF

Ikat 2 staff blong VWC we oli bin participate long young Women's Leadership Program (YWLP) wetem care international blong wan yia mo tufala I graduate long 18th June 2021. Hemi wan yia program we mane blong hem ikam long Ostrelia Gavman we hemi promotem lidasip blong ol yangfala gel mo woman blong oli luksave jenda ekwaliti mo stopem vaelens agensem woman mo ol gel long Vanuatu. Tufala staff ia ikat Leimara Kalorib mo Latanya Bice.

SCC BOOTH LONG TAEM BLONG SISSA KEM

Sanma Counselling Centre (SCC) hemi glad blong save paticipet long ol aktiviti blong Sanma Provins blong promotem Civic educational Program long ol current issue we i afektem laef blong ol woman mo ol pikinini mo olsem wan famili. Domestik Vaelens istap gohet mo Sanma Counselling Centre istap rekodem olgeta data blong wan manis we hemi blong ol survivor we oli nidim help blong toktok wetem olgeta long SCC. Long manis blong jun nomo, SCC I rekodem 172 domestik vaelens kes inkludem wan pikinini-gel. Long olgeta namba ia, 20 long olgeta oli assistem olgeta wetem Famili Proteksen Oda. Hemia soem se, isave mekem pipol I fraet mo iwari mo namba ia isave reflektem se woman mo pikinini oli no seif long kantri blong yumi.



Long ol data we isoem, SCC istap kivim toktok abaot Domestik vaelens iko long ol yut long eli yia blong olgeta. Mifala iwantem ol pipol oli gru wetem andastanding se mifala no akseptem vaelens. Long 22 Julae SCC I taketem ol skul pikinini blong Sanma Provins we oli paticipet long SISSA Gems long Port-Olry mo Hoghabour komuniti. Booth blong mifala ikat brochures, posters, newsletter long Domestik Vaelens mo child abuse. Ol gel mo ol boe oli welkam blong save toktok wetem mi-fala long Sanma Counselling Centre.

TCC IKASEM 2 SKUL MO MEKEM AWEANES

Long Tasdei 22 Julae 2021, Tafea Counselling Centre ibin imekem wan awareness toktok long Child Abuse long Kwamera Skul. Ibin kat awan totel blong 129 man, women, boy mo gel we oli stap tugeta blong lisen long taem ia. Afta long Kwamera Skul, ol staff blong Tafea Counselling Centre mo 2 KAWAW (Komiti agensem vaelens agensem woman) ofisa i bin muv iko long Imaki mo Komuniti Eduketa, i bin tokabout Fisikol Vaelens mo 8 rules blong ol pikinini. Tim i bin manej blong toktok long 128 man, woman, boe mo gel long Imaki.



WANEM NAO YUMI SAVE MEKEM?

- Sapotem ol woman long Human raets blong olgeta.
- Educatem ol woman about domestik vaelens.
- Educatem ol man blong jenjem ol attitudes blong olgeta tuwods ol women.
- ol women we imared oli kat raet blong talem No long ol rabis tritmen we oli stap fesem.
- Yumi mas save law blong kantri blong yumi mo helpem.
- Respectem ol woman.
- Educatem ol man long community blong oli save toktok long raet blong ol woman.

“Yu save se: long wan case study italem se perpetrator blong child seksual asolt hemi:

- Hed blong haos (adopt famili blong gel) (39%)
- Step-papa blong gel (17%)
- Nara man we ino relative blong gel (22%).”

DEI BLONG PIKININI LONG TANOLIU PRIMARY SCHOOL

Olsem evri yia, Vanuatu Women’s Centre hemi bin stap selebratem Children’s Day wetem wanwan skul around long Port Vila mo Efate.

Long Fraedei 23 Julae 2021, Vanuatu Women Centre I selebratem Dei blong ol Pikinini wetem ol skul pikinini, Tija mo perens long Tanoliu Primary Skul . Ibin kat welkam toktok ikam long Deputi Prinsipal blong skul mo ofisol toktok ikam long Kodineta blong Vanuatu Women’s Senta, Ms. Tatavola Matas.

Long toktok blong Kodineta hemi bin talem se; “Selebresen blong Children’s Dei ia ,hemi blong selebretem impotence blong wanwan pikinini.

Hemi talem tu se” evri pikinini oli impoten tumas mo hemi responsibility blong ol parents , tijas mo community blong oltaem toktok positivly mo enkarejem ol pikinini oltaem long ol gudfala fasin. Ol pikinini tu oli shud be risponsibol long hao oli tritim ol fren blong olgeta, ino blong faet mo tok strong lo narafala mo lanem ol gudfala samting we tija istap tijim olgeta long hem long skul”. Long dei ia i lukim Vanuatu Women’s Centre i bin karem out some activities wetem ol pikinini mo evriwan i bin lunch tugeta wetem ol perens mo tija.



ol student blong Tanoliu wetem ol presen blong olgeta.

VWC RISEJ PROKEJ

WANEM YU MAS SAVE

Vanuatu Women’s Centre hemi bin karem out fes nasonal baseline study about vaelens akensem ol woman mo ol gel long Vanuatu long 2009, wetem help blong Vanuatu National Statistics Office. Risej ya i bin soem se plante yangfala woman Vanuatu we age blong olgeta i no bitim 30 years old yet, oli stap fesem plante difren kaen fasin blong vaelens.

Long wan internal study we VWC hemi mekem long last yia long 2021 about ol clients blong VWC long Vila mo long ol branj between 2016 mo 2019 , I faenem se majority long ol client blong yumi hemi ol young women we oli age between 18 mo 29 years old. 51% oli ol yang woman mo ol gel, mo 49% hemi ol woman we oli ova long 30 yia. Hemia hemi soem se taem wan yangfala gel stat gat wan relationship, be hemi start blong fasem Domestik Vaelens long wan yangfala age.

OPEN DEI BLONG VWC



Vanuatu Women’s Centre imakem 29 yia anni-versari blong hem long Tasdei namba 2 Septemba 2021 long VWC hed ofis long Nambatu eria. Hemi festaem we VWC iopen long pablik we yumi lukim ol famili mo ol fren oli kam luk ol display blong difren departmen oli show casem wok blong VWC. Ibin kat ol impoten pipol mo narafala okenaesesen we I witnessem event ia olsem NGOs, donor patnas olsem Ostreila Hae Komisina, Niu Zilan Hae Kom Representative mo impoten pipol olsem foma kodineta Marilyn Tahi, Pablik Prosekuta, Polis mo famili Proteksen Unit, United Nation Women Representative, Oxfam mo plante moa we istap givhan oltaem long wok blong VWC.

Ikat ol gudfala impoten toktok we ibin kam long ol impoten pipol olsem Kodineta blong VWC- Tatavola Matas, Ostreila Hae Komisina Sarah Dezoeten , Fes Sekreteri blong New Zealand Hae Komisina Esther Jens, Daarekta blong UNWomen long Vanuatu Betty Toa mo wan Representative blong ol VWC Male Advocate Inspector Iaken Ampen.Ol pipol ibin kam luk wetem intres mo askem fulap kwestin long saed blong wok long taem ia.

**“YU GLAD LONG KOMUNITI
BLONG YU?
YU WANDEM SE BAE HEMI
NOKAT DOMESTIK VAELENS?
MIFALA TU IWANTEM OL
KOMUNITI OLI JENISIM FASIN IA”.**

TOTOL NAMBA BLONG OL NIU MO RIPIT KLAEN

Branj	Niu Klaen (Woman mo Pikinini)	Ripit Klaen (Woman mo Pikinini)
VWC	758	1845
TOCC	88	328
SCC	350	1365
PECC	187	247
MCC	491	1356
TCC	324	632

**Hemia isoem total blong ol Niu mo Ripit
Klaen (woman mo pikinini we VWC mo ol
Branj ibin luk stat long Jul 2020 kasem Jun
2021.)**
Source: VWC M&E Data
ACR 2016 - 2021

INFOMESEN

Domestic violence emi wan bigfala problem we plante woman mo ol pikinini oli experiencem. Nius blong wan late woman (mama blong 2 pikinini) we emi ded long Santo, emi nomo wan alarming issue we bae sam man oli re-considerem blong jenisim action blong olgeta towards wan woman. Instead, afta long incident ya, sam man oli usum incident ia blong threatenem partner blong olgeta se bae oli mekem sem action olsem long olgeta. Sanma counselling centre emi recordem 205 cases blong domestik vaelens long manis July alone mo aot long olgeta cases ia, 4 mama oli talem aot long kaonselling se partna blong olgeta oli threatenem ol se bae oli kilim death olgeta mo haetem bodi blong ol long river o long solwota semak long incident we country blong yumi iwitnisim long manis July.

Important information igo long ol woman mo ol gel; threatening emi wan kraem anda long Family Proteksen Act. Sapos patna o spouse blong yu emi mekem yu fraet o talemaot long yu se bae wan dei emi kilim death yu mo traonem yu long solwota o river, yu mas lukaotem help quick taem. Vanuatu Women’s Centre mo ol branjes blong hem throughout long Provinces oli save assistim yu blong mekem ripot blong yu iko long Polis. Yu no alaoem blong domestik vaelens emi tekem aot laef blong yu. Yu gat wan laef nomo mo emi angensem constitution blong country blong yumi blong nara man iaotem laef blong yu.

SHEFA KAVAW TRENING



Shefa Provinsol Kavaw trening ibin stap long Lamena aelen, Epi long namba 23 kasep 27 Okis, 2021. Ikat 11 kavaw memba we istap long taem ia mo 1 Male advocate. Ikat wanwan komiti blong Emae, Makira, Lamena aelen mo Varsu.

Oli conductem woksop blong 4 dei mo tokbaot:

- Ripot long wok we oli stap mekem.
- Jenda mo Domestik Vaelens.
- Praktisim hao blong mekem gud aweanes long komuniti.
- Famili proteksen Loa mo plan blong wok 2021-2022.

INFOMESAN ABAOTWOK BLONG VWC

Vanuatu Women's Centre hemi bin bon long Septemba 2, 1992. Long yia ia 2021, bae Senta ikat 29 yia.

Hemi wan nasonel (NGO) we iwok blong stopem vaelens we igohet long ol gel mo woman. VWC istap kodinetem wan nasonel prokram blong prevensan mo rispons sevis long hedkuata long Vila. Insaed ikat:

-5 Branj - Sanma Kaonseling Senta (SCC), Tafea Kaonseling Senta(TCC), Malampa Kaonseling Senta(MCC), Penama Kaonseling Senta(PECC) mo Torba Kaonseling Senta(TOCC).

-Ikat wan rural folentia Netwok blong 36 Komiti Agensem Vaelens Agensem ol Woman (KAWAW), we oli stap mekem aweanes mo ol aktiviti blong helpem ol woman mo ol pikinini.

-wan nasonel netwok blong ol Male Advocate (ol impoten man insaed long komuniti) we oli wok blong tokbaot raets blong ol man/ woman mo wok blong stopem vaelens long ol woman mo ol pikinini.

YU HAREM NOGUD FROM OL RABIS FASIN WE ISTAP HAPEN LONG YU?



Vanuatu Women's Centre ikat ol **Kaonsela**, ko storean wetem olgeta o telefon mo toktok long **Fri Laen 161**



Ol helt senta, ikat ol **Nes** mo **Dokta**, hemi impoten blong toktok wetem ol kwiktaem, taem igat rabis fasin blong seks ikasem yu



Ol **polis** oli kivhan long yu, from sefti long laef blong yu mo pikinini. Yu no fraet, ripotem ol rabis fasin ya. Telefon long **22222** o **111 Fri Laen**



Vanuatu Women Centre ikat **Loea**, oli stap kivhan long yu. Toktok long ol long namba **25764**

(Ol toktok ia i kam long posta blong CARE wetem sapot blong Gavman blong Ostrelia)

WOKSOP MO SETUP BLONG KAVAW LONG SOUTH EAST AMBRYM

VWC I facilitatem 5 dei woksop long Utas vilij long South East Ambrym long 31 Mei kasep 4 Jun 2021. Woksop I accomodatep 35 paticipen we oli kamaot long 16 vilij. Long sesen blong woksop oli tokbaot Jenda, Domestik Vaelens, Famili proteksen loa, Kavaw manejmen mo VWC sevis. Long taem ia oli settemp wan Kavaw komiti.

OL DEFREN FASIN BLONG DOMESTIK VAELENS

- Asolt (faet)
- Seksuel Vaelens olsem Rep mo Seksuel harasmen
- Imosenol vaelens (warines)
- Indisen asolt (hemi mekem ol rabis fasin long famili).
- Tretenem o talem ol strong toktok o fasin

VWC staff i participate long wan consultation workshop long Tanna, we hemi: Tafea Ending Violence Against Woman and Girls Taskforce mo ol session ia Depatmen blong Women's Affairs mo UN-Women I facilitatem. Hemi wan 5 dei woksop we istat long Mandei namba 6 septemba kasep Wednesdei namba 8 septemba, mo lo Tasdei 9 septemba kasep Fraedei 10 septemba 2021; ol paticipen oli bin ko mekem aweanes long defren eria raon long Tanna.



Branj blong Vanuatu Women's Senta

Vanuatu Women's Senta

Telefon: 25764 /161 (Fri Laen)

Email: vwnc@vanuatu.com.vu o

Feshbuk pej: Vanuatu Women's Centre

Torba Kaonseling Senta: Sola -Vanualava Island Torba Provins -7648145/5493357

Sanma Kaonseling Senta:PO Box 335, Luganville, Santo, Sanma Provins- 36157/7771128

Penama Kaonseling Senta: Lavatu, Pentecost, Penama Provins - 7313952/5986827

Malampa Kaonseling Senta: Lakatoro, Malekula, Malampa Provins -7799165/5683670

Tafea Kaonseling Senta: PO Box 835 Lenakel, Tanna, Tafea Provins 88660/ 7101869